

堅

瓠

集

堅瓠餘集序

稼軒褚先生抱巢許之高風居
唐虞之盛世耕雲釣月睥睨天
地之間漱石枕流放浪形骸之
外網羅軼事既耳換而目移欣
賞竒文亦日新而月盛向傳堅

瓠大選又成餘集新編癸甲辛
壬而後另有鱸椎續補廣秘之
餘別成世界中箱可置無煩插
架堆倉行笈堪攜那慮汗牛充
棟坐花醉月下酒物不數漢書
益智娛心換骨丹無煩仙藥斯

誠琅環之異寶實乃委婉之奇
文矣潮也性嗜簡編身希脉望
顧睡餘嬾拾矧爲塵飯塗羹牙
後堪羞况屬牛溲馬勃襲秘笈
於省公即語語都佳亦覺千篇
之二例盜譚概於龍子縱言言

盡善終嫌數見而不鮮先生則
盡掃舊聞專收新著輯近代之
公卿將相允爲斯世楷模載熙
朝之政治文章堪作國人矜式
稽其姓氏半屬吾儕羣紀之交
考厥里居無非此日舟車可至

雖在鄙人之小草亦荷高士之
不遺蠅附驥以能馳藥處囊而
易售此生多幸其樂只且嗟乎
屋梁徒仰窮愁尚有其人空谷
自香紉佩遑需異日採遺珠於
滄海知餘外尚有其餘琢剩玉

序
於崑山冀序後或仍作序

康熙癸未上巳日新安張潮題

堅瓠餘集卷之一目錄

過自標榜

身後名

圓字解

班鄭著書

弄卜

鬼附女卜

異俠借銀

驟得人身

蜀先主墓

金容坊

岳武穆猪精

潮通沙

九蟒御史

題魁星圖

戊午解元

弄璋弄瓦

木工厭勝

木龍

木工建坊

吳淞江

杜女幽婚

淮海龍神

蟄燕

活龜整痛

代吳大帝任

耳中得物

道士妖術

雷神繪壁

蟾宮織登科記

洞口先生

孝道明王

沉香壁首

雷譴逆婦

神助

金沙灘童子

陶琰再生

李福達石函

飄揚金箔

雞舌湯

安南試錄

鬼虎

瘟部神燈

珊瑚夫人

義猴

五足牛

蟻累梅杏

蟋蟀

蝗怒失信

肥蠟

飛魚

蠍魔

六日龜

臂龍

嬾婦化物

黃犬

九尾龜

神騾

枸杞龍形

趙乳醫

弄隴

海馬

堅瓠餘集卷之一

長洲石農褚人獲學稼集輯

過自標榜

管寧與華歆共讀歆見乘軒冕者過而廢書寧遂割席而坐南史劉璣見孔退目送女子遂舉席自隔宋張敷見美人狄當周赴呼左右曰移吾坐遠客齊江敷見倖臣紀僧真命左右曰移我床遠客魏董昭枕

藉則膝卧則推下之曰蘇則膝非佞人枕
梁宦者張僧胤候羊侃侃竟不前曰吾床
非閹人可坐諸君子不以察察受汶汶是
矣無乃過自標榜乎

身後名

李謐擁書萬卷無假南面百城劉晝每言
使我數十卷書行世不易齊景之千駟是
皆好身後名然與其有身後名何如當下

恣流覽之爲適也昔人以讀書不求甚解
爲善讀書此有得於語言文字之外者

趙岐解圓字

說儲漢儒趙岐孟子注云凡物圓則行方
則止此解最明徹嘗試廣其義惟圓則無
障礙故曰圓通惟圓則無礙故曰圓滿
惟圓其機嘗活變化出焉故曰圓轉又曰
圓融蓋至如乾之教極於圓覺大易之用

妙於圓神天下之能事畢矣

班鄭著書

班固作西漢書凡百篇未成有上書言私
改史記者收京兆獄後復除蘭臺令使成
前書鄭虔採集異聞著書八十餘卷有上
書告虔私修國史由是貶謫十餘年後授
廣文館學士更纂錄成四十餘卷名曰會
粹則著述不可不慎也

瓦卜

萬曆間浙人楊生善占瓦卦隣姬失雞楊
占云往西方短牆上求之有傍觀者笑云
據此卦雞當在土墩矮樹上非短牆也俄
而隣姬獲雞果在土墩矮樹楊甚歎異其
人袖出一書授楊云此瓦卦秘訣須細玩
三年後吾來索酬叩其姓名居處不答而
去楊自此瓦卜愈神越三年其人果至楊

敬禮之居數日謂楊曰吾明日將歸子宜有所贈然無費家財只清晨一卜之所獲便足酬我楊不解所謂乃自卜一卦預知其故書片紙置瓦下黎明有負囊叩門來占者楊問其姓曰與君同姓楊卽取瓦下紙示之上云今日今時有假楊姓者來當縛送官其人失色楊云無恐但須傾囊見付當指汝生路蓋此人乃劫盜事露將逃

匿故隱姓來卜欲問所往其囊中皆金珠也既被識破卽盡出以與楊楊乃示一處云於此削髮爲僧可免患盜叩首謝去楊以所獲酬授書者其人笑而受之別去楊未幾亦他徙不知所之

身附文卜

馬敬菴聞見略萬厯辛卯春東城朱奉瀛家一養女有姿色善女紅年可十六七一

日倦繡停針兀坐忽聞窓外嘖嘖有人聲
啓視之見一偉丈夫從簷下作人言曰某
山東人也夙世負汝白鏹六十餘金今當
奉償女卽昏瞶鬼遂隱入女腹乃令其女
垂簾賣卜剖斷如神每朝所獲止許給一
日薪水之費餘俱歸女囊其家計不能祛
女亦無恙幾及二年約足六十金之數其
鬼乃去扣之亦不靈矣

異俠借銀

徽有布商密以千金分貯布捆中載歸路
遇一人求附舟其人狀貌雄偉既登舟與
語甚款洽越二宿將別去岸上有擔囊者
招呼之云其友也其人邀商與友共飲村
店中飲畢其友擔囊先行其人引商至野
外密語云吾有急需君布捆中物暫借一
用某月某日當還宅奉還必不相負幸勿

覺揚召將不利於君言訖長揖而去其行如飛頃刻不見商大駭急還舟布皆捆束如故初無移動心甚疑之遂次不便啓視及抵家視之空空如矣乃大歎異至某日門庭寂然意其所約乃誑語耳三日後其人與友攜囊而至曰償債者來矣出囊中金除前數外積月加息五分又另出銀一封云因吾友遲來棄約三日更當加一月

之利商逡巡問曰君固俠士前日有何急
用而假吾金其人曰吾有至親犯事在官
急欲行賄買命而倉卒無辦故暫假於君
耳商問布捆不動銀何從取去其人笑云
吾自有取法何必見問乃索酒共飲且云
吾輩何處不可取物但恐貽累於人故不
爲也飲至暮夜友云可去矣二人步出中
庭一躍登屋屋瓦無聲人已不知去向

騾得人身

艮齋雜說金文通公爲通衢道時有一旂
牌官自言三世爲猪最苦宰殺之後每經
齧割輒加楚痛如生時後乞冥官變身爲
騾嘗馱一客負囊內數百金遇響馬盜追
之自念客若被劫吾罪更重因奮力渡河
客得脫而騾竟溺死旣見冥官云由汝善
念不但得人身且有小前程也

蜀先主墓

文苑瀟湘嘉靖中盜發蜀先主墓數盜穴墓而入見兩人張燈對墓侍衛十餘盜驚懼拜謝一人顧謂曰爾欲飲乎乃各飲以一杯兼乞與玉帶數條命速出盜出外口已漆矣帶乃巨蛇也視其穴已如舊矣

金容坊

成都金容坊有石二株高丈餘挺然聳峭

舊傳其名有六曰石笋曰蜀妃開曰沉犀
石曰魚鳧仙壇曰西海之眼曰五丁石圖
經云乃前秦寺之遺址武侯接鐵其中一
南一北無偏邪又鐫濁歌燭觸蠲五字時
人莫曉後蜀相范賢曰亥子歲濁字主水
災寅卯歲蠲字主饑饉巳午歲燭字主火
災辰戌歲觸字主刀兵丑未申酉歲蠲字
主稼穡富贍悉以年事推應驗符合

岳武穆豬精

岳武穆微時居相臺爲市游徼有舒翁者
善相術見岳必烹茶設饌密謂之曰吾乃
豬精也精靈在人間必有異事他日當爲
朝廷握十萬之師建功立業但豬之爲物
未有善終君如得志宜早退步岳笑不以
爲然後秦檜下岳于大理獄周三畏鞫之
遇夜周往往間行至鞫所一夕月明見古

木下一物似豕而角周疑却步此物徐行
入獄旁小祠而隱數夕復往所見皆然

潮通泖出閤老

松江雖潮汐往來之地自古未有通泖者
嘉靖庚戌泖始潮故民謠曰潮通泖出閤
老越王子徐文貞階果入相而拜命之日
潮頭突至城內元輔舊第前湧起丈餘人
皆驚異果爲太平宰相一十七年

九嶓御史

鄴都有閼羅廟山側又有九嶓御史祠傳
有御史登此山遭嶓糾纏而死上人神而
祀之甚著靈異嘉靖間祠旁有楊生者每
過祠必下馬致揖忽一日倉卒竟騎而過
御史見夢曰爾前過我必步今乃騎豈簡
我耶爾若要中除非日月倒懸楊謂神尤
已甚不樂已而秋試詩經一題乃如月之

恒如日之升二句遂得雋

題魁星圖

陸文量容戲題魁星詩云天門之下有魁
踢斗癸未之魁必入吾手牆手壁無何去
去一日文量過陸鼎儀鉞鼎儀出以爲玩
文量詰其所自云昨倚門一見持此示我
我以某易之文量惘然曰我二人得失之
兆矣是年鼎儀登進士文量丙戌始第

戊午解元

嘉禾張巽素無文名嘉靖戊午春夢神語
曰成不成平不平綠水灣頭問老僧及邑
試竟置劣等自郡城徒步歸過蕭寺少憩
焉有老僧捧茶進曰解元請茶巽忽憶前
夢問曰此地何名僧曰是綠水灣巽喜且
疑已果發解所云成不成平不平蓋是成
平二字云一作萬歷戊午陳山毓事

美璋美瓦

隆慶庚午紹興太守岑某姬方娠太守出一人衝道縛至府叱曰汝業何事曰賣卜太守曰我夫人有娠弄璋乎美瓦乎試爲卜之其人愚蠢不曉所謂漫應曰璋也美瓦也美太守怒而責逐之未幾分婉雙生一子一女太守竒其術深悔前事禮而厚資之卜人之名遂著

木工厭勝

木工造厭勝者例以初安時一言爲準禍福皆由之婁門李鵬造樓工初萌惡念爲小木人荷枷理戶限下李適見叱問之工惶恐漫應曰翁不解此耶走進婁門第一家也李遂任之自是家遂驟發貲甲其里

木龍

吳有富商倩工造舟供具稍薄疑工必有

他意視工將訖夜潛伏舟尾聽之工以斧
敲礪曰木龍木龍聽我祝詞第一年船行
得利倍之二年得利十之三三年人財俱
失翁聞而識其言初以舟行商獲利果倍
次年亦如言遂不復出一日破其舟得木
龍長尺許沸油煎之工在隣家登時疾作
知事敗來乞命復煎之工仆地掖歸而絕
凡取厭勝者必以油煎見便民圖纂

木工建坊

嘉靖末世宗修予屢興改宮殿楊州木工徐杲主大營繕極被榮寵官至兵部尙書又官其子尋奏言願以所積賞銀自建尙書坊許之隆慶初爲言官所論劾遂籍其家奪官坊亦廢

吳淞江

挑燈集異天順元年吉水龍晉以監察御

史左遷嘉定知縣邑中吳淞江百年以來
之淤滯晉浚治之方鑿地時獲一石上刻
云得一龍江水通晉果奏績又見聞錄吳
淞江久湮童謠云要開吳淞江須湮海龍
王人謂其工難成耳隆慶中巡撫海公瑞
倡議開濬而董其事者則松江府同知黃
成樂蘇州府推官龍宗武也時兩月不雨
卽日奏功其謠始驗

杜女幽婚

聞見畧萬歷中長洋杜子紆大綬有文名
善書法家居集福堦水亭一壺酒不交錯
幽雅多致次年甫十四日與其母刺繡
其母辛卯四月子紆就試荆溪母忽夢一
少年郎君頂金冠衣緋袴僕從甚都升堂
請婦敘禮婦惶悸不敢出少年自通曰某
貴家龍王幼子也因與夫人次女有夙緣

特來就婚婦曰我女可字金閨吳氏已越
四載無更嫁之理且夫君不在媒亦不通
郎君請回少年大怒曰若賴我姓吳爾女
終不能爲吳氏媳也言訖而去婦驚寤越
宿子紆歸婦述其夢子紆謂夢何足憑置
之度外五月朔女曉粧初罷偕侍兒詣亭
前植海榴飾髻瞥見少年從池中躍出挾
之沒水侍兒急呼主母并僕人撈救已沉

水底不復生矣夫婦悲號籲天具棺殯歛
夜夢少年來謝曰爾女已得佳婿哭哭之
勸爲神人道遠千萬鄭重再拜辭別馬散
菴往弔面詢之子紆掩泣以道其詳如此
淮海龍神

吳中雜識長洲貢士張鯉亭燭萬曆丙戌
例選順天經歷子某往探父待舟瓜步見
一虬髯老翁以斗盛蝦米至步頭負販某

欲市以貢父取二尾嘗乾濕甫入口頓覺
瞶眩口發譫語從者驚悸回視老翁已不
見卽僱船回家醫療惟僵卧日飲斗水自
言吾淮海龍神因水滂挈族往東海賃居
汝胡爲食吾子其母求醫遣將多方不治
一日晨起小童驚報堂中磚上有河沙印
成升降二龍鱗甲爪牙畢具母趨視之入
覷其子則血汚被蓆拔舌而死矣

蟄燕

世說海外有燕子國故秋社燕去春社復來月令所謂春分令鳥至是也偶見雜志載晉郗鑒爲兗州刺史時歲饑百姓掘蟄燕食之又宋時東京開河岸崩見蟄燕無數然則燕亦蟄遇驚蟄節氣而出耳渡海之說烏衣之事俱屬附會或云蟄者非燕乃類平燕者也

活龜整痛

挑燈集與冀州徐璠騎馬傷折手足痛甚
命醫治之其方用一活龜既得之矣夜夢
龜曰吾惟整痛不能整骨勿害我命有奇
方奉告璠叩之龜曰取生地黃一觔生薑
四兩搗研之用臘糟一觔入地黃生薑炒
勻之乘熱裹罨傷處冷卽易之先能止癢
後可整骨璠用其法治之果効

代吳大帝任

高叔祖鶴臺公諱九皇萬曆庚辰進士任
武昌司李署江夏縣印出夏口迎其僉憲
泊舫登岸暫憩古廟中見神像乃三國吳
大帝因前叩拜執禮甚恭夜宿官舫夢一
赭袍玉帶王者投刺相謁公分賓主禮坐
定王者曰某孫權也血食此地有年惟公
正直應代斯任幸無他辭公唯諾寤而體

中不豫明日抵縣八衙述其夢卽覺瞋眩
沐浴更衣謂妻子曰今輿從來迎吾當赴
任矣毋煩號泣言畢瞑然而逝異香滿室
顏色如生堂上直宿門卒聞車馬喝道聲
排闥而出盡皆驚起杳無所睹訃聞郡守
暨撫按司道嘉其政績悉致厚賻扶柩還
吳後家中若聞異香則有人馬之聲行於
屋上靈帷必顯報應久之乃絕

耳中得物

陳眉公見聞錄無錫談愉號十洲一日偶
挖耳耳中得銀一小塊重一分四厘人傳
以爲奇後觀祝枝山志怪錄則耳中得物
更有奇於此者葑門一媼年逾五旬令人
剔耳耳中得少絹帛屑以爲偶遺落其中
已而每治耳必得少物絲花穀粟稻粱之
屬爲品甚多始大駭異年七十有八而卒

每收貯所得物三十年中物逾一斛又永樂中吳郡一老偶治耳於耳中得五穀金銀衣服器皿等物凡一箕後更治之無所得視其正中有一小木校椅製作精妙椅上坐一人長數分亦甚有精氣

道士妖術

聞見危言崇邑金某兄弟科貢出仕雲南留家住此一日有衆道士昇宋殿祖師到

門抄化金不爲禮道士遺一紙條夜遂無
故火起梁柱間者數次急救乃息其家向
延蔡某爲西賓蔡攜其子同學一日忽見
兩子在旁聽講面貌不異言語相同呼之
共答不分真假蔡計無所出乃將兩子並
抱繫束不放一子忽墮地急以足踏住乃
是一紙人尚嘖嘖有聲釋其子急取持手
中知吐火者定是此物不付諸火急投諸

水其恠遂滅又安丘勞氏亦爲此輩遺一
紙條遂化爲蛇夜出淫其僕婦主人懼而
厚賂道士求其收去恠遂滅迹

雷神畫壁

廣聞錄萬曆中吳郡西洞庭翠峰寺比丘
維心新構一室初塗白堊夜聞霹靂繞室
晨起視之四壁皆寫山川樹木人物屋宇
極其工緻燦然光明似梅道人筆法

蟾宮織登科記

建炎二年春揚州一士因天氣融和縱步
出城有虹暈如赤環自地吐出遙望其中
有茅舍機杼之音試徐行入觀見有機數
張皆經以素絲白哲女子四五輩植腕組
織輾轉眸一顧士卽端容抽簪不息士見
錦紋花葉之內有字數行第一首曰李易
稍空又有一人姓名復稍空又一人焉士

問織此何爲一女對曰登科記也士遍觀
室內窓壁玲瓏自念得觀美姝復情致澹
泊遂揖而辭退諸女皆目送之迨出町量
回頭注目蕩然無所觀乃躡故道歸是歲
春高宗車駕南巡駐蹕揚都四方貢士雲
集至八月始唱名放榜第一人曰李易其
下次第與夢中所見無異始悟春日所見
蓋蟾宮也

洞口先生

淳熙間信州漁人楊六孤子一身所得魚
錢悉爲酒資一日有道人棹小艇從之賒
魚楊隨所需付之初不索直自是數數來
楊與魚無倦色一夕風月清潔波平如席
楊覩一舟從天際冉冉造前視之蓋向者
道人也微笑相呼盡取所負魚直約兩三
千償之楊固却不受曰我飄然簞笠底安

用幾許錢先生留助雲水費時得周旋否
道人曰我相試已久恰來還錢亦是試汝
汝志堅固真可教也挽之共載一小童操
槳其行如飛迤邐窮河源登岸到山見奇
花珍果異香錯落全不似塵世楊顓覺心
意洒豁便欲依止道人曰此非汝可久居
之地宜暫還後五年復相會出一卷書授
之臨別扣其姓字曰我洞口先生也

孝道明王

子菴雜錄西晉時丹陽有老嫗姓譙氏不知其年幾何顏色常如嬰兒人稱為嬰母嘗於吳市收養一孩長而英異性至孝時談神明之事且云吾受天符爲孝道明王因授母以修真之訣而自隱去後吳猛許遜俱傳興母之道而成仙

沉香雕首

從信錄南昌鄧子龍驍勇率戰領兵征倭
渡鴨綠江有物觸舟取視之乃沉香一段
把玩良久宛似人頭愛護之每入夢則香
與首或對或協而爲一萬曆戊戌冬子龍
衝鋒陣亡載尸歸失其元取香木雕爲首
酷肖豈天感其忠勇憐而賜之沉香作其
面目乎

雷譴逆婦

從信錄嘉靖辛卯福建延平杜氏兄弟三人輪膳一母三人出耕三婦輒訴悍鬪然相勝致姑飯粥不給每欲自盡一日白晝中忽轟雷一聲覺電光紅紫眩目三婦人皆人首而身則一牛一大一豕踣地鳴吠觀者如堵

神助

鄭有胡生爲洗鏡鉸針之業輒祭列禦寇

祠以求聰慧忽夢一人以刀割其腹開納書一卷及覺遂能吟咏又說儲載一書生禮奎宿甚虔同儕戲之以經書文七首置神座前書生得之喜爲神賜稽首受而讀之及入試命題一如所讀竟登第又一人見荆溪周處祠神像蒙垢盥手拂拭之其人素羸忽覺神旺後以勇聞此無他精誠所致遂得神助也

金沙灘童子

誌異編隆慶中鄂城金沙洲一童子每死去三四日復活父母問其所以亦絕不言後隣翁坐廟廡下捫虱有人從後掌其腦回顧不見翁大驚童子一日復活見隣翁問曰公知廟廡下掌腦者乎此我也因言在陰司爲無常奉符勾攝人今某縣某人某里某人皆我所勾繫在後園樹上母聞

往視乃是線繫促織小蟲皆解而放之童子見而號泣倒地曰此輩生我死矣遂死不復活某訪之有竟死者有死去復生者

陶琰再生

廣莫野語絳州陶琰未第時讀書僧寺偶游息見僧抱婦於懷亟回走僧追之謂事至此勢不俱生矣追至佛殿忽起烈風香灰迷僧目僧大叫其黨不得放走陶秀才

陶度不得脫奔入鐘樓樓下一鐘覆地有
年忽自起陶入鐘隨獲僧遍索不得不虞
其在鐘下也俄陶僕來僧給已歸家人尋
覓無踪夜夢神指示所在促使急救未之
信夕復夢示集衆舉鐘陶出無恙已三日
鳴之官僧伏法舉成化辛丑進士歷浙藩
轉南大司馬致仕卒贈少傅諡恭介

李福達石函

唐聞錄嘉靖中僧李福達至蘇州欲稅空
宅徧閱數處輒嫌湫隘最後賃一大宅入
居人異而闕之福達從容袖中出小石函
縱橫不數寸凡衣服飲食牀褥卧具屏障
几席釜餽一切資生之物盡從中出又於
函中挈出婦人男子凡數輩皆其妾媵又
有十餘小兒皆衣五綵戲將行還挈諸人
並器玩一一納之石函中仍袖而去

飄揚金箔

劉五城雜錄有一豪富子弟張某其父歿
昆仲析居之次有餘資千金各不欲存爲
公家事以滋擾願一創舉散之頃刻遂貨
金箔約值此數至絕高山頂乘風揚舉或
飄舞長空或粘綴林木或散處水草總成
黃金世界數里之內人皆驚詫若狂疑爲
天雨黃金婦女兒童競爲爭逐終無所得

一時傳爲異事而張氏親黨莫不稱爲豪
舉較之隋煬帝於景華宮徵求螢火數斛
夜出遊山放之螢光徧於山谷反覺鄙陋
但煬帝富有四海奢侈過度尚且不能令
終此一富有之民乃暴殄財貨取快一時
不知其人作何究竟也

雞舌湯

宋呂文穆公微時極貧故有渴睡漢之謂

比貴盛喜食雞舌湯每朝必用一夕遊花園遙見牆角一高阜以爲山也問左右誰爲之對曰此相公所殺雞毛耳呂諤曰吾食雞幾何乃有此對曰雞一舌耳相公一湯用幾許舌食湯凡幾時呂默然省悔遂不復用○吾菰一宦喜食鯽魚舌湯每朝必用鯽魚若干頭取舌烹湯以進

安南試錄

安南國去中國數千里雖名秉聲教實自
帝其國建元初制無忌也其國凡幾道如
中國藩省然有安邦道者其中之一道也
人有見安邦道鄉試錄題曰洪德二年辛
卯科初場四書義四篇五經義五篇二場
制誥表各一道三場詩賦各一篇四場長
策一篇其取士之法比中國反加詳焉表
賦中聯句佳者甚多

鬼虎

稽神錄載清源陳襄隱居別業臨窓夜坐
窓外卽曠野忽聞有人馬聲視之見一婦
人騎虎自窓前行過屋西壁下時壁下有
一婢卧婦人從壁隙中窺之婢卽驚呼腹
痛啓戶如廁遂爲虎所搏襄駭愕大聲號
救婦與虎忽不見婢幸無恙鄉人云村中
恒有此怪所謂鬼虎者也子一日偶談及

此事一友笑曰人畏虎亦畏鬼况二者兼之耶又况加以婦人耶婦人之凶狠陰毒者甚於虎與鬼也予曰此婦必是妬婦之鬼故有此殺婢手段

瘟部神放燈

吳中雜志萬曆戊子四月王墓村民初臺演戲賽神城中某某宴集李氏樓中正歡洽間忽聞烈風迅雷撼木飄瓦啓牖視之

見朝天湖內有火大如鼎瑩光燁燁閃爍
水面須臾星散遍湖南北村落僞現百千
燈火魚貫而行逾時乃滅眾賓矚目次日
詢諸父老云是瘟部神放水燈嘉靖某年
間亦然主旱疫是歲夏六月亢旱天行大
作吳民死者相枕籍視嘉靖間尤甚識者
以爲輪迴中一劫數云

珊瑚夫人

異聞錄有人於昭應寺讀書見一紅裳女子吟詩云金殿不勝秋月斜石樓冷誰是相憐人褰幃弔孤影叩其姓氏云姓朱名昭遠字無忌上祖在漢時因宣揚釋教封長明公唐天寶中帝爲貴妃建設經幢封妾爲珊瑚夫人賜珊瑚帳居之自此裴郎蛾子不復爲暴矣言訖恍惚入經幢而隱乃詳味其詩與所言蓋經幢中燈也

義猴

聞見略萬曆中毘陵有乞兒日繫一猴至街坊施技索錢積數歲約有五六金偶與同伴一丐飲醉中誇詡丐忽起謀心置毒於酒強灌之而死取其所藏瘞屍於野外無人知覺獨猴不順從丐日加捶楚猴勉隨之一日忽失所在時縣尹張廷傑初下車升堂瞥見一猴突入趺坐丹墀向令叫

號張異之命一隸隨其去向猴竟至養濟
院覓丐不獲復扯隸行沿途乞點餅與隸
點心行至大市橋遇丐雙手拽住跳上丐
肩批頰抓面丐不能脫隸擁至縣張鞫問
再三丐始伏辜令隸押丐取銀包裹宛然
仍于野外扒開浮土將屍入棺火厝烟焰
方熾猴向隸叩頭跳入火中焚死隸復命
張驚異因作義猴記刻石以垂不朽

五足牛

庚巳編正德丙子有僧自京師携一牛至蘇有五足一在後跨下短不能及地蹄類人手五指間有皮連絡僧率于市乞錢所目睹者正統中劉原博先生上京師其子宗序見道旁一牛五足其一足生於領蹄反向上以告先生先生曰牛土屬而蹄着土今反居上得無有小人上而生變者

乎後二歲爲己巳果有土木之變○廣聞
錄嘉靖庚申鍾祥民家牛生六足又隆慶
年間三山民家牛生黃犢七足腹下四足
如常脊上三足皆輒前後竅各二

蟻累梅杏

嘉靖甲寅嘉興郡學有蟻無數集堂壁上
累梅一章枝幹花葉皆具又吳匏菴先生
及策日群蟻累成杏花一枝極其精巧

蟋蟀

吳俗喜鬪蟋蟀多以財物決賭庚巳編載
相城劉浩好鬪促織偶臨水濱見一蜂以
身就泥轉輾數四起集敗荷上久之身化
爲促織頭足猶蜂也持歸養之經日則全
變矣健而善鬪敵無不勝所獲甚多又張
廷芳亦好之至蕩其產芳素敬平壇神乃
以誠禱訴其困乏夢神告曰吾遣黑虎助

爾已化身在天妃宮東南角樹下矣明日
芳往覓之獲一促織色黑而大用以鬪無
弗勝者旬日間獲利如所喪者加倍至冬
而死芳爲慟哭以銀作棺葬之

蝗怒失信

湧幢小品萬曆丙辰丹陽有蝗從西北來
蔽天翳日民爭割羊豕禱神有蒲大王者
尤號靈異凡禱之家止嚙竹樹焚香不及

五穀有朱姓者牲醴忍其兄蝗已過遂寢
須臾蝗復返集朱田凡七畝頃刻盡嚼而
去鄰苗不損一穎相傳有怪書投其祠曰
借道不借糧亦可異也

肥蠟

從信錄萬曆丙戌建昌鄉民樵於山逢巨
蛇頭有一角六足如雞距見人不噬亦不
驚民因羣呼往視亦不敢傷徐徐入深林

中去華山記云蛇六足者名曰肥蠃見則
近郊大旱戊子己丑之災兆已先見矣

飛魚

庚巳編沙湖丘氏有魚池近外港夏大雨
水溢魚長數尺者率諸魚飛出港去至暮
未漸退魚復還巨魚在前諸魚從之飛行
空中如群蝶交舞嘗觀范蠡養魚經有魚
能飛去之說但去而復飛還則尤異也

蠍魔

西安有蠍魔寺中奉大士塑大蠍於棟間
相傳明初有女子素不慧病死復生遂明
敏以文史知名時有布政某喪偶娶之後
布政方視事有所需使僕入內取之婢呼
夫人不應但見大蠍如車輪卧於榻婢驚
而出白於主不信婢曰他日相公下堂願
無聲欬伺之可見如言果見老蠍伏榻上

頃之又成好女子意頗羞澀矣忽失所在
是夕人定女子乃出拜燈下曰身本蠅魔
所以夤緣見公者非敢爲幻惑欲有求耳
公能不終拒乃敢輸情布政許之因曰昔
爲魔得罪冥道賴觀音大士救援免死因
假女屍爲人獲侍左右覬公建一蘭若以
報大士之德耳今醜迹已彰幸公哀憐布
政領之女子遂隱他日乃命所司建寺

六眼龜

郭景純江賦龜有六眸宋太始二年八月
六眼龜見于東陽太守劉綽得之以獻唐
肅宗先天三年江州獻靈龜六眼腹下有
丕文又嶺南欽州出六眼龜實止兩眼餘
四口乃斑紋與真目排比端正不偏唐莊
宗時有進六目龜者敬新磨獻口號曰不
要開不要開聽取龜兒口號六隻眼兒睡

一覺抵別人三覺又說儲載常熟水墩大
士菴前曾出六目龜九十三翁繆道山得
而畜之又廣聞錄載嘉靖二十年興寧西
河水漲有大龜長丈餘六日金光射人泝
河而上所過田陂皆壞○吾郡十郎巷丁
玉陽先生園池中有白龜大如車輪順治
辛丑長洲縣令德州孫達卿繼解任後寓
店園亭所目擊者

臂龍

庚巳編金山寺有行者素佻健嘗晝寢同輩戲畫一龍於臂頭尾鱗鬣逼真行覺而見之曰吾寢而臂出龍豈非天授乎當黥之以成其異乃以針刺而加墨焉數月色漸紫又數月其紋隱起約高一黍米每風雨之夕龍蜿蜒如動一日浴於江江水爲之豁開數丈此臂騰掉上下如非已有行之豁開數丈此臂騰掉上下如非已有行

以爲神時時泗水鼉鼉魚鱗歷歷在目忽
念金山盤踞江心其下宜有根著乃下探
之至江底見山根大僅數抱若一柱擎其
山焉因運臂撼之山搖屋動僧怖爲地震
焚香祝三寶行登山知而竊笑之向同輩
吐實具言臂龍之神皆驚以白長老長老
以爲妖詣官告治官爲誣罔不理長老懼
爲已累醉行而縊之龍亦頓逝

嬾婦化物

水族有嬾婦魚相傳楊家婦爲始所溺死
化爲魚脂可燃燈照鳴琴博奕則有光照
紡績則暗草類有嬾婦箴桂林有睡草見
之則令人睡一名醉草獸亦有名嬾婦者
如山猪而小喜食禾田夫以機軸織紵之
器置田所則不復近安平七源等州有之
物猶如此宜乎嬾婦之多也

黃犬

偃曝談餘博羅何字母死廬墓家無僕從
畜一黃犬間日輒候墓所有所需卽書片
紙繫其頸家人見之具備繫使負還史稱
陸機黃犬寄書良不誣也又趙澤民爲山
西廉使時畜一犬名桃花善獵有客至卽
呼名嗾之語家人先具酒果良久桃花必
致一物如麋鹿雉兔之類往無虛反

九尾龜

庚巳編海寧王屠遇漁父持巨龜長徑尺
買繫灶下將烹以爲羹隣居有江右商人
見之告其邸翁請以千錢贖焉翁怪其厚
商曰此九尾龜神物也欲買放之君從吏
成此功德一半是君領取因偕往商踏龜
背其尾之兩旁有小尾各一錢乞王王
不肯烹作羹父子共啖是夕大水自海中

來平地高三尺許床榻盡浮逾時水退明日及午翁怪王屠不起壞戶入視但見衣衾在床父子都不知去向人云害神龜爲水府攝去治罪也

神驪

馬氏曰抄京師梓潼廟在平武門東人常以白驪施廟中道士控群驪日行巷陌以芻豆爲由募化銀錢一大驪特異不受羈

糾糾則卧弗起遂縱之往來城市數日一
還廟道士恐爲人所傷於項下懸一木牌
標曰神騾日少食芻粟喜啖茶葉沿門駐
立乞茶糜之弗去以茶餉之卽行日以爲
常一劫盜禱借於神欲乘往德州以茶餌
之至河西務加以銜勒堅卧不肯行遂捨
之而還

枸杞龍形

聞見卮言載嘉興郡治西子墻上有枸杞
一本歲月旣深枝幹亦大樹身絕似龍形
鱗爪逼肖垂四枝極宛如四足夜間數里
外遠望爍爍有光近睇之却無所見常於
風雨之夕空中聞怒吼之聲隣近居人恐
其日久爲患將斧伐去一極滋瀝星星越
宿皆赤成血此後不復聞吼然龍形異質
至今尙存

趙乳醫

夸堅志資州去城五十里曰三山村草木
暢茂豺虎縱橫人莫敢近乳醫趙十五嫂
所居相距三十里一夕聞人扣門請收生
趙遽隨行步稍遲其人負之而去云只閉
眼任我所之勿問登高涉險奔馳如風不
勝驚顛至石崖下謂趙曰吾乃虎也遇神
仙授以妙法在山修持已三百年誓不傷

人能變化不測汝不須怖今緣吾妻臨蓐
危困知媪善此伎所以相邀倘能保全母
子當以黃金五兩奉酬便引入洞中具酒
食見牝虎委頓且跪懇趙慰勉之於洞外
摘嫩藥數葉揉碎塞虎鼻卽噴嚏數聲旋
產三子牝虎卽負趙歸明夜戶外有人云
謝你相救出此一里他虎傷一僧衣內有
金五兩可往取之黎明而往如言得金

瓦隴

有堅志溫州洪慶善妻丁氏雖居海濱而
性不嗜殺或惠瓦隴卽蚶百餘枚不忍食
寘之盆中將以明日放之江夜夢丐者甚
衆蹠體臃瘠前後各以一瓦自蔽皆有喜
色別有十餘人愀然曰爾輩甚樂我等抑
何苦也丁氏寤而思之以瓦蔽形必瓦隴
也夢中能密記其數取視之已爲一妾竊

食十餘枚乃愀然者也

海馬

紹興八年廣州西海墉地名上弓灣月夜有海獸狀如馬蹄鬣皆丹突入近村居民聚衆殺之天將曉如萬隊兵馬行空中其聲洶洶皆稱覓馬所殺之獸倏忽不見客有識者慮其異急徙去次日海水溢環村百餘家皆溺